

Historijski dan u Kiseljaku, dokaz uspješnog rada Pravnog fakulteta

Prva promocija diplomanata na Pravnom fakultetu Kiseljak

Vrijeme koje je ispred nas trebalo bi da se posveti isticanju ovakvih primjera i svakako pružanju prilika onima koji to uz svoje obrazovanje doista i zaslužuju

Pripremila: Mimesa Halilović

Prva generacija bolonjskih studenata Pravnog fakulteta Kiseljak uspješno je prvi ciklus svog studija dovela do kraja. U skladu sa osnovama ovakvog sistema obrazovanja studentima je pružena prilika da nakon četiri godine steknu akademsku titulu, uz mogućnost zaposlenja ili nastavka studija. Ovo je zaista za sam Fakultet i jednu tako malu sredinu historijski dan. Ovaj trenutak jedan je od početnih koji grade status jednom kvalitetnom i priznatom Fakultetu.

Nove generacije, nova budućnost

„Izuzetno sam ponosan što mi je formiranje ovog fakulteta dalo priliku da upoznam jednog velikog čovjeka, entuzijastu koji sav svoj život ulaže u osnivanje škole u malom mjestu. Moj drugi ponos je što sam dekan takvog Fakulteta i treći- najveći ponos, moji studenti- garancija da će ovaj fakultet živjeti“, na samom početku promocije rekao nam je dekan Mehmed Kenović. Tako su dočekani prvi diplomanti koji su zajedno sa svojim prijateljima, roditeljima i počasnim zvanicama došli da svečano prime svoje diplome. Oni su jedan od vrijednih dokaza da na Fakultet dolaze nove generacije i vrijedna budućnost.

Znanje kao prilika za kvalitet

„Ako ima nade da se pobijedi zlo, ta nada je u obrazovanju“. Vrijeme koje je ispred nas trebalo bi da se posveti isticanju ovakvih primjera i, svakako, pružanju prilika onima koji to uz svoje obrazovanje doista i zaslužuju. Promocija diplomanata na Pravnom fakultetu Kiseljak jedna je od prilika kada nam postaje jasno da se procenat obrazovanih ljudi u našoj zemlji povećava, na zadovoljstvo svih. Kako nam i sam dekan iznosi, veliki je broj onih koji govore o pravnom studiju kao o jednom prezasićenom segmentu. Međutim, pravnici su ti koji mogu da obavljaju poslove u više branši. Preko 90 % pravnika koji su stekli



Prva promocija diplomanata na Pravnom fakultetu Kiseljak



„Moj ponos je što sam dekan Pravnog fakulteta Kiseljak“ – prof. dr Mehmed Kenović

diplomu, uspjeli su i da se zaposle. Na kraju, diplomanti su ti koji imaju diplomu, na njima je i da obogate našu praksu.

Početak učenja i uvođenje evropskih tokova

Iako je sam Kiseljak relativno malo mjesto, broj studenata pokazuje zainteresiranost i uspješnost rada od samog osnivanja. Pomoćnik ministra obrazovanja Srednjobosanskog kantona, Zoran Matošević, također je među brojnim gostima prisustvovao promociji diplomanata. Uputio je čestitke diplomantima, ali im istovremeno i naglasio da ovo nije kraj već početak njihovog učenja u zemlji koja stremlji ka evropskim tokovima. Čestitao je ne samo diplomantima, već i roditeljima koji su uspjeli da im priušte studij, te profesorima i dekanu na vrijednom radu i kompletnoj organizaciji studija.